

Lalu mulailah Petrus berbicara, katanya: "Sesungguhnya aku telah mengerti, bahawa Tuhan tidak membezakan orang. Setiap orang dari bangsa mana pun yang takut akan Dia dan yang mengamalkan kebenaran berkenan kepada-Nya. Itulah firman yang Dia suruh sampaikan kepada orang-orang Israel, iaitu firman yang memberitakan damai sejahtera oleh Yesus Kristus, yang adalah Tuhan dari semua orang."

Kisah Para Rasul 10:34-36

Januari 11, 2026

www.heraldmalaysia.com

Masa depan di tangan Tuhan



TAKHTA SUCI: Pada hari terakhir tahun 2025, Sri Paus Leo XIV memimpin Ibadat Senja Hari Raya Besar Maria Bonda Tuhan di Basilika Sto Petrus. Liturgi itu merangkumi lagu-lagu, Mazmur, bacaan dari Kitab Suci, dan nyanyian "Te Deum", sebuah lagu kesyukuran dalam bahasa Latin dari Gereja awal. Dengan kehadiran kira-kira 5,500 umat beriman, Sri Paus berkata bahawa liturgi malam itu mempunyai "kekayaan yang unik pada akhir tahun, berasal dari misteri yang mengagumkan."

Rancangan Tuhan untuk dunia

"Setelah genap waktunya, maka Tuhan mengutus Anak-Nya, yang lahir dari seorang perempuan dan takluk kepada hukum Taurat. Ia diutus untuk menebus mereka, yang takluk kepada hukum Taurat, supaya kita diterima menjadi anak," petikan Alkitab dari Surat Sto Paulus kepada Jemaat di Galatia ini, yang dibacakan semasa Ibadat Senja, merupakan tema utama khutbah Sri Paus Leo.

Dalam khutbahnya, prelatus itu bercakap tentang rancangan Tuhan berbanding rancangan yang dibuat oleh dunia.

"Pada zaman ini, kita merasakan keperluan untuk rancangan yang bijak, baik hati, dan penuh belas kasihan — rancangan yang bebas dan membebaskan, aman dan setia, seperti kidung Maria yang memuji rancangan Tuhan yang dihabiskan oleh malaikat kepadanya: "Dia mengasihani mereka yang takut akan Dia, daripada satu keturunan kepada satu keturunan yang lain" (Luk 1:50).

Sri Paus berkata bahawa cara misteri Kristus ini dipersembahkan "mengingatkan kita kepada rancangan besar sejarah manusia—rancangan yang misteri, tetapi mempunyai pusat yang jelas, seperti gunung tinggi di tengah-tengah hutan lebat yang diterangi matahari."

"Hari ini, dalam masyarakat yang dibebani oleh dosa, kita sangat memerlukan rancangan yang bijak, baik hati dan penuh belas kasihan," kata Sri Paus.

Beliau memberi peringatan bahawa terdapat rancangan lain yang sedang berjalan di dunia iaitu "strategi jahat yang bertujuan untuk menakluki pasaran, wilayah, dan alam ciptaan; strategi bersenjata, yang tersembunyi di sebalik retorik munafik, proklamasi ideologi dan motif agama palsu."

Jubli: Waktu rahmat

Di Basilika Sto Petrus, sebelum lagu kesyukuran tradisional *Te Deum* dinyanyikan, Sri Paus Leo menyatakan kesyukurannya kepada Tuhan atas "anugerah Tahun Jubli yang telah menjadi tanda yang kuat bagi rancangan harapan-Nya untuk kemanusiaan dan untuk dunia."

Dalam khutbahnya, prelatus itu bercakap tentang rancangan Tuhan berbanding rancangan yang dibuat oleh dunia.

"Perawan Maria melihat rancangan Tuhan dengan mata Tuhan. Dia tahu bahawa "dengan kekuatan lengan-Nya, Yang Maha Tinggi berkuasa menceraikan rancangan orang yang sombong, membuang orang yang berkuasa dari takhta mereka dan meninggikan orang yang rendah hati, mengisi orang yang lapar dengan perkara yang baik dan menghantar orang kaya pergi dengan tangan kosong."

"Bonda Yesus adalah wanita yang taat kepada Tuhan, pada masa yang ditetapkan, melahirkan firman yang mengungkapkan misteri," ujar Sri Paus Leo.

"Tuhan tidak memaksanya; dia terlebih dahulu mencaangkan rancangan-Nya dan sebaik sahaja Maria mengatakan 'ya', Tuhan mengungkapkan cinta yang tidak tercap melalui Maria," katanya.

"Oleh itu, harapan Tuhan terjalin dengan harapan Maria," tambahnya.

Prelatus itu juga mengucapkan terima kasih kepada semua yang, sejak hari pertama Tahun Jubli 2025 diwartakan, mereka bekerja dengan penuh dedikasi melayani para penziarah sehingga menjadikan Roma kota "ramah-tamah" dan lebih mudah diakses.

Keramahan ini, kata Sri Paus Leo, adalah hasrat yang diutarakan oleh mendiang Bapa Suci Fransiskus setahun lalu. "Saya ingin keramahan dan keceriaan ini berterusan lebih-lebih lagi selepas Tahun Jubli Harapan berakhir."

Kota Roma dan darah para martir

Sri Paus Leo menyatakan bahawa "Jubli ialah tanda besar dunia baharu, diperbaharui dan didamaikan mengikut rancangan Tuhan."

Dan "Tuhan yang Sang Perbendaharaan telah menyediakan tempat istimewa, kota Roma — bukan kerana kemuliaannya, bukan kerana kuasanya, tetapi kerana Petrus dan Paulus serta ramai lagi martir telah menumpahkan darah mereka di sini untuk Kristus. Itulah sebabnya Roma diangkat menjadi kota Jubli."

Sri Paus Leo menyatakan harapan agar bandar atau kota itu akan menjaga orang miskin dan lemah: "Semoga bandar ini, yang dihidupkan oleh harapan Kristian, berada dalam perkhidmatan rancangan kasih Tuhan untuk keluarga manusia."

Selepas liturgi, Sri Paus kemudian keluar ke Dataran Sto Petrus untuk berdoa di hadapan palungan serta beramah mesra dengan umat di situ. **Media Vatikan**

Buku terbaik bagi saya tahun 2025

Sto Augustinus pernah berkata: *Mengenai selera, tidak boleh ada perdebatan.* Jadi, senarai buku berikut mungkin tidak memberikan kesan kepada anda seperti yang saya rasai. Ini ialah buku-buku yang paling menyentuh hati saya sepanjang tahun lalu.

Dalam bidang kerohanian popular...

- **Tomas Halik**, *The Afternoon of Christianity, The Courage to Change.* Halik adalah salah satu suara utama dalam kerohanian Kristian hari ini, dan buku ini tidak akan mengecewakan.
- **Serene Jones**, *Call It Grace – Finding Meaning in a Fractured World.* Presiden *Union Theological* di New York, Jones memberikan catatan bukan autobiografi tentang perjalanan hidupnya dan dalam rahmat. Bacaan yang berbaloi.
- **Jeffrey Munroe**, *Reading Buechner, Exploring the Work of a Master Memoirist, Novelist, Theologian, and Preacher.* Pengenalan terbaik kepada karya Frederick Buechner yang kita ada. Mungkin buku kegemaran saya tahun ini.
- **Richard Rohr**, *The Tears of Things, Prophetic Wisdom for an Age of Outrage.* Karya Rohr pada tahap terbaiknya. Sebuah buku yang akan menguji anda dengan cara yang sihat. Antara cabarannya:
 - Orang suci dan mistik yang menangis di hadapan salib pertama sekali



menangis air mata sejagat untuk dunia yang menderita.

- Dalam kelemahan kita, kita lebih layak mendapat air mata daripada kebencian, pembaikan, atau penafian.
- Bahasa seorang nabi berubah daripada kemarahan terhadap dosa kepada belas kasihan terhadap penderitaan dan luka. Kemarahan tidak membenarkan kita membuat perubahan besar, air mata pula membenarkan.
- **Robert Ellsberg, Editor**, *Dorothy Day, On Pilgrimage, The Seventies.* Surat-surat Dorothy Day dari tahun tujuh puluhan. Bacaan yang sangat baik.
- **Jim Wallis**, *The False White Gospel, Rejecting Christian Nationalism, Reclaiming True Faith, and Refounding Democracy* Jim Wallis ialah Dorothy Day generasi kita. Buku ini merupakan cabaran yang kuat untuk mengambil Yesus dengan lebih serius, dan kadangkala secara lebih literal.
 - Tuhan itu peribadi tetapi tidak pernah peribadi.
 - Siapakah jiran saya mesti melangkahi siapa yang menerima dokumentasi rasmi. Jiran anda, seperti yang ditakrifkan oleh Yesus, selalunya berada di luar zon selesa anda. Yesus berkata, "Kasihilah jiranmu seperti dirimu sendiri" tanpa pengecualian!
 - Kita berada dalam bahaya jika mengembangkan ideologi yang tidak menganggap "orang lain" sebagai sebahagian daripada kita. Kembali ke tempat asal kamu!

Idea bahawa orang yang berbeza daripada anda, bukanlah jiran anda dan anda tidak perlu menyayangi mereka, dan anda mempunyai kebenaran untuk membenci mereka.

Mengecualikan dan menyerang mereka yang berbeza, menolak orang buangan dan orang luar, meletakkan anda

bertentangan dengan Yesus.

bertentangan dengan Yesus.

bertentangan dengan Yesus.

- **Joseph F. Kelly**, *The Origins of Christmas.* Kelly, seorang ahli akademik yang serius, mengesankan (dalam bahasa yang sangat mudah dibaca) bagaimana kita harus memahami kisah-kisah Krismas dalam Injil.
- **Robert Wicks**, *The Art of Kindness.* Saya mengesyorkan buku ini pada kulitnya dengan kata-kata ini: "Robert Wicks mempunyai perbendaharaan kata rohani yang unik dan berbakat. Sangat sedikit penulis yang mempunyai keupayaan seperti beliau untuk menggabungkan yang istimewa dan yang biasa, yang akademik dan yang jalanan, serta kedalaman wawasan rohani dengan akal budi yang kukuh."

Buku ini memaparkan semua itu, lengkap dengan sentuhan humor yang sihat. Dia memulakan buku itu dengan petikan berikut: *apabila bunga tidak mekar, betulkan persekitaran tempat ia tumbuh, bukan bunganya.* Dan dari situ, bermula kisah penceritaannya yang menarik.

Beberapa buah buku akademik...

- **William T. Cavanaugh**, *The Uses of Idolatry.* Wawasan kritikal tentang interaksi antara budaya dan iman kita. Cavanaugh berhujah bahawa kita tidak, seperti yang dicadangkan oleh Charles Taylor, tidak terpesona berhubung dengan transenden. Sebaliknya, kita terpesona semula dengan tuhan-tuhan lain. Buku ini merupakan bacaan akademik yang penting.
- **Charles Taylor**, *Cosmic Connections – Poetry in an Age of Disenchantment.* Amaran: Buku ini sangat akademik, padat, dan lebih daripada enam ratus halaman, tetapi Taylor adalah salah seorang ahli falsafah terkemuka generasi kita dan dalam buku ini (di suatu tempat terselit di antara semua halaman itu) terdapat berpuluh-puluh pandangan yang cemer-

lang. Sebagai contoh, mengenai nilai puisi:

- Falsafah tidak mampu mengabaikan wawasan puisi.
- Puisi boleh menjadi cara untuk mempesonakan semua dunia.
- Puisi adalah terjemahan wawasan ke dalam bahasa yang lebih halus.
- Dan puisi adalah emosi yang diingit kembali dalam ketenangan.

Antara novel...

- **Jane Urquhart**, *In Winter I get up at night.* Malangnya, sepanjang tahun lalu saya tidak membaca banyak novel kerana saya memberi tumpuan kepada buku bukan fiksi.

Saya berasa kesal kerana fiksi yang ditawarkan oleh Urquhart tidak seperti novel fiksi biasa.

Novel Urquhart ini adalah satu-satunya novel yang menonjol bagi saya. Berlatarkan Saskatchewan, ia adalah cerita yang bergerak perlahan, tetapi menampilkan prosa Urquhart yang (sentiasa) cemerlang. Bacalahnya kerana gaya bahasanya, walaupun ceritanya tidak menarik minat anda.

Dan satu buku tambahan ...

- **Margaret Atwood**, *A Book of Lives – A Memoir of Sort.* Buku ini tidak sesuai dengan mana-mana genre tetapi, seperti kata pepatah Latin, *sui generis*, spesies yang tersendiri. Ini bukan sekadar autobiografi, tetapi lebih kepada Atwood yang sekadar mengimbas kembali kehidupannya, dari zaman kanak-kanak sehingga hari ini.

Ia setebal enam ratus halaman, tetapi sebaik sahaja anda bermula, seperti ketagihan, anda akan terus membelek halaman demi halaman. Ringan, berwawasan, lucu, berat. Atwood adalah penulis yang hebat.

Selamat membaca, buku-buku ini atau yang lain. **Hakcipta Terpelihara 1999-2026@ Fr Ron Rolheiser**

Air sendiri menjadi suci kerana Dia ...

Kita merayakan kelahiran Kristus pada Hari Natal. Kelahiran Kristus kemudian diumumkan kepada dunia dalam Hari Raya Penampakan Tuhan, ketika orang-orang majus datang untuk menyembah Yesus dan mempersembahkan kepada-Nya hadiah: emas, kemenyan dan mur, untuk melambangkan identiti-Nya.

Misteri Inkarnasi semasa Natal mencapai puncaknya dengan Pembaptisan Tuhan.

Dan dengan Pembaptisan Tuhan, misteri keselamatan bergerak dari Inkarnasi ke Misi.

Peristiwa Pembaptisan Tuhan mengajak kita untuk memahami peranan utama Yesus dalam sejarah keselamatan dan Yohanes ialah bahagian penting untuk mempersiapkan panggung bagi Yesus.

Yohanes menyedari bahawa dirinya hanyalah seorang utusan. Yohanes juga menyedari ada perbezaan antara Pembaptisan yang dilakukannya dan Pembaptisan yang akan diberikan oleh Kristus.

Yohanes membaptis dengan air, dan Kristus membaptis dengan Roh dan Api. Pembaptisan dengan air menandakan Pembaptisan yang membersihkan bahagian luar saja, sedangkan Pembaptisan Roh dan Api adalah lebih mendalam.

Pembaptisan dengan Roh mempunyai erti memberikan kekuatan untuk mengenakan kehidupan yang baharu, dan api

memurnikan dan menguduskan secara utuh, luar dan dalam.

Kristus datang ke dunia untuk menyelamatkan orang berdosa. Semasa pembaptisan-Nya, Kristus dinyatakan kepada dunia sebagai Putera Terkasih Bapa.

Dalam hal ini, kita juga diingatkan akan Pembaptisan kita sendiri, bahawa kita juga, di dalam Kristus, adalah kekasih Bapa.

Memang, cinta adalah jiwa misi. Tanpa cinta, tidak akan ada makna atau tujuan atau arah dalam hidup. Tanpa cinta, tidak akan ada misi.

Yesus datang untuk menyelamatkan kita dengan menunjukkan kasih Tuhan kepada kita. Melalui Pembaptisan, kita dipersatukan dengan Kristus dalam misi-Nya. Semoga kita menunjukkan kasih Tuhan kepada orang lain.

Kita diajak untuk tidak hanya berupaya mengumpulkan harta sebanyak-banyaknya. Kita diajak untuk berani membagikan apa yang kita punyai kepada orang lain di sekitar kita.

Dengan cara ini, kita mampu mengalirkan kasih Tuhan kepada sesama. Kasih Tuhan itu selalu kita peroleh setiap saat. Kita ingin agar kasih Tuhan itu tidak hanya menjadi milik kita.

Kita ingin kasih Tuhan itu juga menjadi milik sesama yang ada di sekitar kita, kerana itulah makna, tujuan dan arah hidup

kita.

Sempena Pesta Pembaptisan Tuhan, ia merupakan kesempatan bagi kita untuk merenungkan kembali Pembaptisan kita masing-masing.

Pembaptisan bukanlah sekadar peristiwa simbolik atau kejadian monumental belaka, tetapi sungguh peristiwa yang menuntut pada perubahan hidup yang nyata.

Peristiwa Pembaptisan itu bukanlah sekadar sebuah peristiwa pada titik waktu pada masa lampau, tetapi permulaan sebuah perjalanan seumur hidup untuk semakin menyerupai Kristus.

Itulah permulaan dari sebuah proses pertumbuhan dalam kesatuan kita sebagai anggota tubuh Kristus.

Pembaptisan bukan sekadar bahawa kita menjadi Katolik secara rasmi, tetapi menjadi penanda bahawa kita dimeteraikan sebagai milik Kristus.

Maka, kalau kita menyadari bahwa kita adalah milik Kristus, seharusnya kita juga siap dipakai oleh Kristus untuk melanjutkan karya-karya cinta kasih yang sudah dilakukan-Nya dan ditetapkan-Nya sebagai hukum yang paling utama.

Melalui pembaptisan-Nya, Yesus ambil bahagian sepenuhnya dalam kemanusiaan kita, bukan kerana Dia memerlukan pengampunan dosa atau kerana Dia memerlukan segala bentuk pembersihan.

PESTA PEMBAPTISAN YESUS TAHUN A

YESAYA 42:1-4.6-7
KISAH PARA RASUL 10:34-38
INJIL MATIUS 3:13-17

Namun, melalui pembaptisan-Nya, Dia menyatukan kita semua orang berdosa dengan diri-Nya sendiri, dan menguduskan air pembaptisan, sehingga sejak saat itu, melalui Perjanjian Baru, Dia akan menebus kita dan menyucikan kita melalui air yang diberkati, berpindah dari kematian dan dosa ke dalam hidup baru yang diberkati oleh Tuhan.

Ketika esok hari kita memasuki Masa Biasa, hidup kita sama sekali tidak seharusnya biasa-biasa saja.

Ramai di antara kita yang sering salah faham tentang erti 'Biasa' di Masa Biasa. . Erti biasa di sini sebenarnya bukan sekadar biasa, tetapi lebih merupakan pengingat bagi kita akan tindakan yang harus kita semua lakukan harus pertama-tama menyerahkan hidup kita untuk melayani Tuhan.

Sama seperti Tuhan memulai pelayanan-Nya setelah pembaptisan-Nya, demikian pula kita dipanggil untuk memulai perjalanan iman ini.

Semoga Tuhan memberkati kita dalam setiap perbuatan baik dan usaha kita, sekarang dan selamanya. Amin. **Lumen Christi**



Penutupan Tahun Jubli Harapan di pelbagai Keuskupan, Malaysia

Keuskupan Agung Kuala Lumpur: Kita adalah pembawa harapan Kristus



KUALA LUMPUR: Uskup Agung Julian Leow dan Nunsio Apostolik ke Malaysia, Uskup Agung Wojciech Zaluski, bersama Uskup Agung Emeritus Tan Sri Murphy Pakiam dan 11 orang paderi dari Keuskupan Agung Kuala Lumpur, memimpin Misa Kudus penutup Tahun Jubli Harapan pada petang Disember 28, 2025.

Uskup Agung Julian menekankan ada satu kebenaran bersinar lebih terang semasa Tahun Jubli iaitu kisah Yesus sedia untuk diceritakan dalam cara ba-

haru melalui Gereja, komuniti dan ziarah.

Bapa Uskup Agung menambah bahawa "kita perlu terus menjadi pembawa harapan Kristus kepada golongan terabai, golongan kurang upaya, dan anak-anak kecil dengan menceritakan kisah terhebat dan orang terhebat yang pernah hidup, iaitu Yesus Kristus!"

Prelatus itu berpesan, "Untuk menerima rahmat Tuhan, kembalilah kepada Tuhan dengan hati yang baharu, carilah perdamaian dan penyembuhan,

bina semula hubungan, perbaharui kepercayaan kepada kasih dan kurniaan Tuhan. Kita dipanggil untuk menjadi teman dalam perjalanan mereka, supaya mereka dapat menerima kehidupan baharu dan berbuah."

"Untuk terus memikul salib kita," kata Uskup Agung Julian, "kita mesti terus dengan apa yang kita dipanggil untuk menjadi pengurus: untuk mendoakan dan untuk menyatukan semula diri kita dengan ahli keluarga kita yang terabai."

Keuskupan Pulau Pinang: Siap siaga menuju MPC 2026

PULAU PINANG: Harapan menyokong kita dengan memberi inspirasi, dan memperkasakan kita dengan iman, kasih sayang dan belas kasihan untuk terus berjuang melalui ujian dalam kehidupan (KGK 817-1821.) Kata-kata tersebut digemakan oleh Kardinal Sebastian Francis semasa memimpin perayaan Ekaristi penutup Tahun Jubli 2025 di Katedral Roh Kudus, Disember 28.

Prelatus itu mengungkapkan penghargaan kepada mendiang Bapa Suci Fransiskus yang memulakan Tahun Jubli Harapan, yang mengukuhkan makna dan keperluan untuk menjadi penziarah harapan dalam dunia yang penuh ketidakpastian.

"Dipenuhi dengan harapan yang berasal daripada Ilahi, kita

dipanggil untuk melakukan ziarah – sama ada secara fizikal atau maya, yang membawa kepada pergerakan transformasi rohani. Ziarah merupakan masa untuk berefleksi, muhasabah diri, meraiikan kebaikan serta mengutamakan Tuhan dalam kehidupan kita."

Dengan harapan yang hidup dalam hati kita, kita menjadi pemberi harapan kepada orang lain walaupun dalam masa yang paling gelap. Setiap doa yang penuh harapan dan usaha yang penuh belas kasihan terjalin menjadi "permaidani iman yang menguatkan kita semua."

Uskup Pulau Pinang itu menegaskan, "Tahun Jubli Harapan 2025 ditutup tetapi ini tidak bermakna kita berhenti untuk

mewartakan harapan sebaliknya harapan Ilahi menggesa kita untuk terus memperbaharui iman kita lebih-lebih lagi sempena Perhimpunan Pastoral Malaysia (MPC) 2026."

"Sembilan bulan lagi, dalam perhimpunan MPC," kata Kardinal Sebastian, "orang-orang yang mempunyai tujuan dan visi bersama untuk masa depan Gereja Katolik di Malaysia akan bertemu, membuat keputusan dan bekerjasama. Saya dapat melihat bagaimana Roh Kudus membimbing kita dengan lebih berkesan terutamanya dalam masa perubahan dan cabaran yang pesat ini."

"Waktu untuk bermimpi bersama impian yang berakar umbi dalam iman dan harapan un-



tuk Gereja (kolektif) di Sabah, Sarawak, dan Semenanjung, bersatu dengan Gereja Universal, bertenaga, inklusif, membina

jambatan dan komited untuk mewartakan Injil dengan semangat baharu."

Keuskupan Agung Kota Kinabalu: Teladani kebajikan Keluarga Kudus

KOTA KINABALU: Ribuan umat menyertai perarakan dan Misa Kudus penutup Tahun Jubli Harapan di Katedral Hati Kudus, Karamuning pada Disember 28, 2025.

Perarakan bermula dari Dewan Paroki Katedral Hati Kudus, yang diketuai oleh Uskup Agung John Wong.

Hari Minggu itu juga merupakan Pesta Keluarga Kudus, menjadi kesempatan bagi Uskup Agung John bagi menyeru umat mengenang kembali bagaimana Keluarga Kudus menghadapi cabaran dan kesukaran yang dihadapi dengan meletakkan kepercayaan sepenuhnya kepada Tuhan.

Prelatus itu menggalakkan umat agar meneladani kebijaksanaan dan kebajikan Keluarga Kudus.

"Selain mempercayai Tuhan, kasih sayang, kesederhanaan dan kerendahan hati telah mengikat Yesus, Maria dan Yosef, untuk selalu bersama dan bersabar dalam semua keadaan."

Pada akhir Misa, Uskup Agung John memberikan berkat khas, mengutus umat beriman dengan iman, harapan, dan komitmen yang diperbaharui untuk menghayati serta mempraktikkan Injil dalam kehidupan seharian mereka. **Kojuna Davis**

Keuskupan Melaka Johor: Belajarlah untuk bersabar

JOHOR BAHRU: Penutupan Tahun Jubli Harapan di Keuskupan Melaka Johor dimulakan dengan Adorasi dan Benediktus diikuti Misa Kudus penutup yang dipimpin oleh Uskup Bernard Paul di Katedral Hati Kudus.

Prelatus itu mengimbas kembali tema Tahun Jubli iaitu

'Para Penziarah Harapan' yang dipilih oleh mendiang Bapa Suci Fransiskus.

Ketika itu, Sri Paus Fransiskus mahu menyampaikan harapan kepada dunia yang menderita akibat perang, krisis iklim dan kesan berterusan pandemik COVID-19 dengan mengangkat tema yang

dipetik dari Roma 5:5: "Harapan tidak mengecewakan, kerana kasih Tuhan telah dicurahkan ke dalam hati kita melalui Roh Kudus."

Uskup Bernard menjelaskan bahawa kehidupan kita ialah perjalanan menuju Tuhan. "Dalam hidup ini, kita bukannya pelancong tetapi penziarah."

Prelatus itu menjelaskan aspek "Harapan Kristian" sebagai "kelebihan teologi" bukannya sekadar optimisme.

"Harapan dalam Kristus ialah tindak balas terhadap krisis, penawar kepada keputusan, perpecahan sosial dan antidot kepada kehidupan moden yang sibuk dan selalu tergesa-gesa."




Keuskupan Agung Kuching: Tuhan tempat perlindungan kita

KUCHING: Keuskupan Agung Kuching menamatkan Tahun Jubli 2025 dengan membawa Salib Tahun Jubli dalam perarakan keluar pada Disember 28, 2025, semasa Misa Pesta Keluarga Kudus, di Katedral St Joseph.

Uskup Agung Emeritus John Ha yang memimpin Misa, dalam khutbahnya, merenungkan perjalanan yang perlu ditempuhi oleh Keluarga kudus demi melindungi bayi Yesus daripada Raja Herodes.

Mereka menjadi pelarian ke



Mesir. Yosef menghadapi cabaran tetapi percaya bahawa "Tuhan ada di sana untuk melindunginya dan keluarganya dan itu adalah 'ziarah harapan'."

"Harapan Kristian ialah apa yang menyokong kita hari ini, dan selama setahun, Tahun Jubli telah mengin-

gatkan kita berulang kali bahawa kita adalah penziarah harapan," kata Uskup Agung Emeritus John Ha.

Pada akhir Misa, Salib Tahun Jubli dibawa keluar dalam perarakan, sebuah simbolik berakhirnya Tahun Jubli 2025 yang bertema, "Penziarah Harapan". **Sumber Today's Catholic**



● Laporan Penutupan Tahun Jubli Harapan di pelbagai Keuskupan, Malaysia seterusnya di mukasurat BM 8.

Sahabat kecil Yesus

Cari perkataan tersembunyi



LYOHANESGHIU
 AHYORDANVCXL
 NZDIBAPTISNKO
 GOBKEHENDAKM
 IROHTUHANCVS
 TFGWQSUIPOKIL
 TSYURGAQWXCL
 HMMERPATIKOM



MERPATI TUHAN YOHANES DIBAPTIS
 SYURGA KEHENDAK YORDAN

Lengkapkan firman Tuhan dalam kotak dialog di bawah.

Engkaulah Anak-Ku yang Ku _____, kepada-Mulah Aku _____."



WARNAKAN GAMBAR INI.

Gunting setiap kotak yang mengandungi perkataan di bawah. Kemudian, campur adukkan. Bawalah rakan-rakan untuk membina semula ayat berdasarkan Kitab Mazmur.

TU HAN

IALAH TEMPAT

PERLINDUNGAN

KI TA

(MAZMUR 62:9)

Tuhan menampakkan diri-Nya melalui semak terbakar kepada Musa (Keluaran 3:1-4:23). Bantu Musa untuk mencari jalan untuk datang ke hadirat Tuhan.



MULA

Anak-anak yang dikasihi,

Tahukah anak-anak bahawa sakramen pembaptisan ialah sakramen pertama yang diterima oleh seorang yang hendak menjadi anggota Gereja Katolik?

Apakah pula makna 'sakramen'? Sakramen adalah tanda nyata kasih Tuhan yang diberikan lewat tindakan simbolik yang suci, dan membawa rahmat bagi yang menerimanya.

Apakah rahmat bagi yang menerima sakramen pembaptisan? Melalui air pmbaptisan, dosa asal dihapuskan dan kita rasmi menjadi anggota Gereja Katolik.

Anak-anak mungkin tertanya-tanya mengapa bayi perlu dibaptis sedangkan mereka belum melakukan sebarang dosa lagi.

Sudah tentu bayi tidak boleh berdosa apabila mereka masih sangat kecil, tetapi pembaptisan akan memberi mereka rahmat apabila mereka

memerlukannya.

Sama seperti Yesus, Dia tidak mempunyai dosa asal atau dosa sebenar tetapi mahu dibaptis. Pembaptisan Yesus menunjukkan ketaatan-Nya kepada Bapa, mengingatkan kita akan kasih-Nya yang agung sehingga sanggup sengsara, wafat dan bangkit demi menebus dosa-dosa dunia.

Antie Melly

BELIA

Sri Paus Leo serubelia sentiasapilih damai

ROMA: Sri Paus Leo menggalakkan golongan muda yang menyertai persatuan Aksi Katolik Itali untuk berdamai dengan seseorang yang rapat dengan mereka pada musim Krismas, menekankan bahawa keamanan adalah lebih berharga daripada sebarang hadiah yang dibeli di kedai.

"Kita semua menginginkan kedamaian ini untuk negara-negara yang tercedera akibat konflik, tetapi marilah kita ingat bahawa keharmonian dan rasa hormat bermula dalam hubungan harian kita, dalam gerak isyarat

dan kata-kata yang kita tukar di rumah, di paroki, dengan rakan sekolah, dalam sukan," katanya ketika bertemu dengan kumpulan itu dan pemimpin mereka.

Sri Paus menekankan bahawa kelahiran Kristus "Putera Damai", seperti yang disebut dalam Kitab Yesaya — memperlihatkan makna sebenar perkataan ini iaitu damai "bukan sekadar ketiadaan perang, tetapi persahabatan antara sesama berdasarkan keadilan."

"Kedamaian ialah hadiah yang hanya boleh ditemui di dalam hati," sambungnya, sambil menambah bahawa mempromosikan damai ialah "tindakan Katolik" yang unggul, kerana ia adalah isyarat yang menjadikan kita saksi Yesus, Penebus dunia."

Dalam ucapannya, Bapa Suci

Leo menekankan bahawa, dengan melihat pelbagai figura yang hadir dalam adegan Kelahiran Yesus (Nativity scene) yang mungkin telah dipasang di rumah, sekolah, dan paroki, anak muda dapat melihat bahawa "semua orang layak menerima keselamatan dan cinta kasih Tuhan!"

Kumpulan belia Catholic Action menggunakan tema untuk tahun 2025, "Ada tempat untuk semua orang". Tema ini memperlihatkan bahawa Tuhan "memberi tempat kepada setiap orang, setiap kanak-kanak, remaja, orang muda, dan orang tua dan sesiapa sahaja, untuk menerima cinta kasih, belas kasihan dan penyelamatan-Nya," tegas Sri Paus.

Apabila Anak Tuhan datang ke dunia, Dia tidak mendapat tempat di dalam rumah, tetapi Dia



mengetuk hati kita sama seperti Dia membuka hati-Nya sendiri untuk menyambut semua orang dengan cinta.

Lihatlah Santo Carlo Acutis dan Pier Giorgio Frassati

Sri Paus Leo XIV kemudian menjemput golongan muda Aksi Katolik untuk memohon menjadi seperti malaikat yang mengisytiharkan kemuliaan dan kedamaian Tuhan kepada semua apabila mereka berdoa di hadapan palungan.

"Kedamaian ini adalah komitmen setiap orang yang berkehendak baik, dan terutamanya kita orang Kristian,

yang dipanggil bukan sahaja untuk menjadi baik, tetapi untuk menjadi lebih baik setiap hari," kata Sri Paus. Beliau menggesa golongan muda untuk mencontohi Sto Pier Giorgio Frassati, yang merupakan ahli Catholic Action, dan Sto Carlo Acutis.

"Dengan bertindak seperti mereka, proklamasi kedamaian anda akan bersinar, kerana dalam pergaulan dengan Yesus anda akan benar-benar bebas dan gembira, bersedia untuk menghulurkan tangan kepada jiran anda, terutamanya mereka yang memerlukan," katanya. **Media Vatikan**

SANDAKAN: Seramai 86 orang belia, berumur 15 hingga 17 tahun, dari tiga kumpulan bahasa Sekolah Minggu, sukacita menerima Sakramen Krisma, baru-baru ini di Katedral St Mary.

Misa Krisma dipimpin oleh Uskup Julius Dusin Gitom yang menyatakan rasa gembiranya melihat para krismawan yang bersedia diurapi minyak suci sakramen penguatan.

Dalam homilinya, Uskup Julius menyeru para krismawan untuk merenung secara mendalam tentang sakramen dan rahmat yang akan mereka terima, mengingatkan mereka bahawa Roh Kudus datang dengan tujuh karunia, namun

Menjadi sahabat iman dan penabur benih keamanan

'khasiat' tujuh karunia itu bergantung kepada tindakan atau sahtutan iman.

Prelatus itu menjelaskan bahawa karunia kebijaksanaan akan membantu para krismawan melihat kehidupan dari perspektif Tuhan dan bertindak balas dengan kasih sayang dan tanggungjawab, manakala karunia pemahaman membolehkan mereka mengenali tujuan Tuhan, terutamanya pada masa kekecewaan atau doa yang tidak

dijawab.

Karunia nasihat pula membimbing mereka untuk membuat keputusan yang baik dan berkongsi firman Tuhan dengan orang lain, sama ada di Sekolah Minggu, di sekolah, di tempat kerja atau di mana sahaja mereka berada.

Karunia ketabahan, salah satu kebajikan Sakramen Krisma, memberikan keberanian dan kekuatan untuk tetap teguh dalam ujian, dengan mengetahui bahawa Tuhan

sentiasa bersama mereka.

Karunia pengetahuan membantu mereka menghargai kebenaran iman mereka dan mengenali tangan Tuhan dalam segala perkara.

Karunia ketakwaan memperdalam pengabdian, kepercayaan, dan kasih sayang mereka terhadap Tuhan, dan hormat kepada Tuhan, mendorong mereka untuk merendahkan hati dan keinginan untuk tidak pernah menyinggung kasih Tuhan.

Uskup Julius mengingatkan mereka bahawa selepas dikuatkan oleh Roh Kudus, setiap mereka dipanggil untuk memberi kesaksian tentang Berita Baik.

Seorang murid sejati "tidak akan senang melihat rakan-rakan tanpa keselamatan atau masih tidak mengenal Kristus."

Mereka akan digerakkan oleh Roh untuk berkongsi Kristus dengan orang lain.

Semoga remaja yang baharu menerima sakramen krisma ini terus bertumbuh dan teguh dalam iman, beraniewartakan Injil dan prihatin terhadap mereka yang terabai, miskin dan sakit.



Berita singkat antarabangsa

Bapa Suci berdoa untuk keluarga

VATIKAN: Pada hari Minggu, Disember 28, 2025, sempena Pesta Keluarga Kudus Yesus, Maria, dan Yosef, Sri Paus Leo XIV menyeru umat beriman untuk terus berdoa bagi keamanan di dunia, khususnya untuk keluarga yang menderita akibat konflik keganasan.

"Bersempena Krismas, marilah kita terus berdoa untuk keamanan. Hari ini, khususnya, marilah kita berdoa untuk keluarga yang menderita akibat perang, untuk kanak-kanak, warga emas dan golongan yang paling lemah," kata Sri Paus Leo XIV semasa memimpin doa Angelus di Dataran Sto Petrus.

Dalam renungannya, Sri

Paus menekankan bagaimana keluarga Kristian boleh menjadi cahaya dalam masyarakat tempat kita hidup — yang bukan sahaja ditandai dengan konflik tetapi juga dengan pengasingan dan perselisihan — dengan merenungkan pengembaraan Keluarga Kudus ke Mesir sejurus selepas kelahiran Yesus kerana melarikan diri daripada penganiayaan Raja Herodes.

Bapa Suci menggalakkan keluarga untuk menghargai nilai-nilai Injil dengan berdoa, menerima sakramen — terutamanya Pengakuan dan Komuni — dan mempromosikan "semangat yang sihat, dialog dan kebaikan harian." Media Vatikan

Selalu berharap, di tengah-tengah ketidakpastian dunia dan masa depan

HO CHI MINH: Keuskupan Phan Thiet di Vietnam secara rasmi menutup Tahun Jubli Biasa 2025 pada Disember 28, 2025 dengan Misa Kudus di Katedral Phan Thiet.

Misa itu bertepatan dengan Pesta Keluarga Kudus Yesus, Maria, dan Yosef.

Uskup Joseph Do Manh Hung memimpin liturgi di katedral. Dalam homilinya, Uskup Hung Joseph mengatakan bahawa penutupan Tahun Jubli tidak

menandakan berakhirnya rahmat tetapi permulaan kehidupan Kristian yang diperbaharui.

"Kita kembali kepada rentak kehidupan biasa, namun dengan hati yang diperbaharui oleh rahmat Tuhan," kata uskup itu.

Beliau mengimbas tema Tahun Jubli, "Penziarah Harapan" bahawa harapan Kristian berakar umbi dalam iman dan ini disokong melalui hubungan umat dengan Tuhan." LICAS News

Umat Katolik di Jepun digesa terus jadi saksi harapan Kristian

TOKYO: Seorang kardinal mengesakan umat Katolik di Jepun untuk terus berjalan bersama golongan yang lemah meskipun Tahun Jubli telah berakhir dan menegaskan, misi Gereja tentang harapan tidak berakhir meskipun Tahun Jubli 2025 telah ditutup.

Kardinal Isao Kikuchi menyampaikan mesej itu semasa memimpin Misa Kudus di Katedral St Mary pada Disember 28, 2025.

Beliau berkata tema Jubli 2025, "Penziarah Harapan"

kekal sebagai seruan berterusan di tengah-tengah dunia yang mengalami keganasan, migrasi dan keputusan.

"Hanya kerana Tahun Jubli ini telah berakhir, tidak bermakna kita akan berhenti menjadi penziarah yang membawa harapan. Teruslah membawa harapan Kristus kerana dunia hari ini amat memerlukannya."

Katanya, "Harapan Kristian berakar umbi dalam iman dan ini disokong melalui hubungan umat dengan Tuhan." LICAS News

Para kardinal seru umat lanjut menghidupi harapan Kristian

ROMA: Pertaubatan, berjalan menuju belas kasih Tuhan, dan panggilan untuk hidup dalam harapan Kristian, harus diteruskan meskipun Tahun Harapan 2025 telah melabuhkan tirainya, kata tiga orang kardinal yang menutup Pintu Suci di tiga basilika utama di Roma.

Pada perayaan Epifani, Januari 6, Sri Paus Leo XIV telah menutup secara rasmi Pintu Suci Basilika Santo Petrus di Vatikan untuk mengakhiri Tahun Suci 2025, yang dibuka oleh Sri Paus Fransiskus pada Malam Natal 2024.

Perayaan Jubli di peringkat keuskupan pula berakhir pada Disember 28.

Kardinal Rolandas Makrickas, paderi agung untuk Basilika Santa Maria Maggiore, memimpin upacara penutupan Pintu Suci basilika tersebut pada Disember

25.

Kardinal Baldassare Reina juga melakukan perkara yang sama di Basilika Santo Yohanes Lateran pada Disember 27, 2025.

Kardinal dari Amerika Syarikat, James M. Harvey, paderi agung untuk Basilika Santo Paulus di Luar Tembok, memimpin penutupan Pintu Suci di Basilika Paulus di Luar Tembok pada Disember 28, 2025.

Pintu-pintu Suci ditutup dengan batu bata dan dibuka setiap 25 tahun. Sri Paus Leo XIV menyatakan bahawa Tahun Suci luar biasa akan merayakan peringatan 2,000 tahun kematian dan kebangkitan Yesus.

"Yang ditutup hanyalah pintu, bukanlah rahmat Ilahi dan pintu hati Tuhan tetap terbuka buat selama-lamanya!" Media Vatikan



Ketagihan judi penyebab kemiskinan, membunuh keluarga

VATIKAN: Krisis demografi, "perjuangan keluarga dan golongan muda, pengasingan sosial dalam kalangan warga emas, "tangisan senyap" golongan miskin, pencemaran alam sekitar, dan "konflik sosial" adalah antara masalah besar yang dihadapi oleh bandar-bandar di seluruh Itali, kata Sri Paus Leo baru-baru ini.

Prelatus itu berucap semasa mesyuarat dengan datuk bandar dari *Associazione Nazionale dei Comuni Italiani* (Persatuan Kebangsaan Pihak Berkuasa Tempatan Itali) di Vatikan pada Disember 29, 2025.

Untuk menangani masalah-masalah ini, kata Sri Paus Leo, pertama sekali, ia memerlukan tindakan mendengar suara orang yang lemah dan miskin. Beliau menekankan, "jika tidak, demokrasi akan menjadi lemah, ia hanya akan menjadi nama, satu formaliti."

Bapa Suci Leo kemudian berkata

bahawa beliau ingin menarik perhatian khususnya kepada "masalah perjudian yang telah memusnahkan banyak keluarga."

"Statistik menunjukkan peningkatan besar di Itali dalam beberapa tahun kebelakangan ini," tegas Sri Paus, sambil menyoroti laporan Caritas baru-baru ini yang menyatakan perjudian sebagai masalah serius serta menyumbang kepada masalah kesihatan mental di negara itu.

Menjelaskan isu itu sebagai satu bentuk "pembunuh senyap keluarga," Sri Paus Leo menyeru pihak berkuasa awam untuk memeranginya dengan menggalakkan "hubungan sesama yang akrab dan saling menyokong antara satu dengan lain."

Memetik kata-kata Don Primo Mazzolari, seorang paderi Katolik Itali abad ke-20 dan aktivis sosial, Sri Paus menekankan bahawa Itali

"bukan sahaja memerlukan pembetung, rumah, jalan dan, saluran air tetapi juga cara untuk saling mengambil tahu, cara memandang antara satu sama lain, dan cara bersatu sebagai saudara dan saudari."

Sri Paus Leo turut mengingatkan Pesta Kanak-kanak Suci, yang disambut sehari sebelumnya, di mana Gereja memperingati kanak-kanak kecil yang dibunuh oleh Raja Herodes dalam usaha untuk membunuh bayi Yesus.

Pembunuhan beramai-ramai ini, kata Sri Paus, adalah manifestasi "kuasa yang tidak berperikemanusiaan, kuasa yang "tidak mengetahui keindahan cinta kerana ia mengabaikan maruah kehidupan manusia."

Kelahiran Yesus, sebaliknya, "mendedahkan aspek paling tulen antara semua kuasa, yang mengatasi segala tanggungjawab dan perkhidmatan." Media Vatikan

2026: Masa untuk bersyukur, berharap


ROMA: Awal tahun 2026 juga menandakan berakhirnya Tahun Jubli 2025 yang berpusat pada tema "Penziarah Harapan".

Namun, "pintu harapan" tidak tertutup kerana harapan tidak mati, malah ia bersifat "generatif", seperti yang ditekankan oleh Sri Paus Leo XIV semasa audiens Jubli, Disember 20, 2025.

Jubli akan berakhir; namun, harapan yang diberikan oleh Tahun Jubli 2025 kepada kita tidak akan berakhir: kita akan terus menjadi penziarah harapan! Kita akan terus mendengar dan mempraktikkan iman kerana "dalam harapan ini kita diselamatkan" (Rm 8:24).

Tanpa harapan, kita mati; dengan harapan, kita datang ke cahaya. Harapan itu menjana. Sesungguhnya, ia adalah kebajikan teologi, iaitu kekuatan Tuhan, dan oleh itu ia tidak membunuh, sebaliknya melahirkan dan memperbaharui. Ini adalah kekuatan sebenar.

Apa yang mengancam dan



membunuh bukanlah kekuatan: ia adalah kesombongan, ia adalah ketakutan yang agresif, ia adalah kejahatan yang tidak menghasilkan apa-apa.

Mendiang Sri Paus Santo Yohanes Paulus II pernah berpesan, "Tahun Baharu muncul di hadapan kita sebagai sesuatu yang tidak diketahui, tidak dapat dijangka, sebagai ruang yang perlu kita isi dengan pelbagai peristiwa dan keputusan. Ia seperti

pentas baharu dan ruang baharu untuk perjuangan antara kebaikan dan kejahatan, sama ada pada peringkat setiap manusia mahupun, secara bersama, pada peringkat keluarga, masyarakat, negara, dan seluruh umat manusia.

"Namun begitu, jemputlah Tuhan Yesus, bagi mengisi kalendar anda dengan melakukan karya-karya kebaikan dan penginjilan!" Media Vatikan

Belajarlah untuk berserah kepada Tuhan

TAKHTA SUCI: Sri Paus Leo XIV menggunakan audiens umum terakhir Vatikan pada tahun 2025, Disember 31, 2025 untuk mengajak umat Katolik menoleh ke belakang pada tahun lalu dengan rasa syukur dan taubat, serta menyerahkan apa yang menanti di hadapan ke tangan Tuhan.

Di Dataran Sto Petrus, Sri Paus Leo berkata tahun 2025 membawa kegembiraan dan kesedihan kerana “pemergian mendiang Sri Paus Fransiskus” dan “senario perang yang terus menggoncang planet ini.”

“Pada penghujungnya, Gereja mengajak kita untuk meletakkan segala-galanya di hadapan Tuhan, mempercayai diri kita dalam pemeliharaan-Nya dan memohon kepada-Nya untuk memperbaiki, dalam diri kita dan di sekeliling kita, dalam hari-hari yang akan datang, keajaiban rahmat dan belas kasihan-Nya.”

Uskup Roma itu mengaitkan hari terakhir tahun 2025 sangat sesuai dirayakan dengan perayaan *Te Deum* Gereja, dengan mengatakan bahawa lagu pujian dan kesyukuran itu membantu umat beriman mengenali kurniaan Tuhan dan memperbaiki harapan untuk tahun 2026.

Bapa Suci Leo menyatakan bahawa *Te Deum* sarat dengan pujian dan doa seperti: “*Engkaulah Tuhan: Kami memuji-Mu*”, “*Dalam Engkau, ya Tuhan, harapan kami*” dan “*Kasihnilah kami*.”

Sri Paus Leo telah merayakan ibadat senja pertama sempena pesta Maria, Bonda Tuhan di Basilika Sto Petrus, diikuti dengan *Te Deum*.

Dalam katekesisnya, Sri Paus meng-



galakkan pemeriksaan hati nurani yang jujur, menyeru umat beriman untuk merenungkan tindakan Tuhan sepanjang tahun lalu, menilai sahutan mereka terhadap kurnia-Nya, dan memohon ampun atas masa-masa mereka gagal mengikuti ilham-Nya atau tidak menggunakan bakat yang diamanahkan kepada mereka dengan baik.

Bapa Suci Leo juga mengimbas kembali Tahun Jubli Harapan.

Katanya, “Tahun ini tidak terkecuali kerana penziarah telah datang dari seluruh dunia untuk berdoa di Makam Petrus dan untuk mengakui ketaatan mereka kepada Kristus.”

“Ziarah mencerminkan kebenaran yang lebih mendalam tentang kewujudan manusia. Ziarah juga mengingatkan kita bahawa seluruh hidup kita ada-

lah satu perjalanan.

“Seluruh hidup kita adalah sebuah perjalanan menuju ke destinasi yang melampaui ruang dan masa, perjalanan yang dipenuhi dengan pertemuan dengan Tuhan, dalam persekutuan yang penuh dengan-Nya dan sebuah perjalanan iman bersama umat yang lain.”

Pada akhir audiens, Sri Paus Leo memetik renungan daripada Sto Paulus VI semasa mengakhiri Tahun Jubli 1975, dengan mengatakan bahawa mesej utamanya boleh dirumuskan dalam satu perkataan iaitu “cinta”.

Beliau kemudian mengulangi beberapa kata pengakuan iman yang tegas oleh Paulus VI, termasuk: “*Tuhan adalah kasih! ... Tuhan adalah rahmat! Tuhan Maha Pengampun! ... Tuhan, ya, Tuhan adalah kehidupan! Media Vatikan*

Jus rohani untuk jiwa

Ramai daripada kita, apabila kita duduk untuk berdoa atau semasa menghadiri Misa Kudus, kita dikejutkan oleh gangguan yang berterusan.

Gangguan itu boleh berupa bunyi jam berdetik di dinding, bunyi hon di luar, atau pun rentetan pemikiran tentang pelbagai orang atau hubungan dalam hidup kita.

Mungkin sukar untuk memfokuskan perhatian kita kepada Tuhan dan kekal untuk diam dalam hadirannya.

Namun, kadangkala gangguan ini bukanlah “gangguan” sama sekali, sebaliknya ia adalah pemikiran yang didorong oleh Tuhan yang bertujuan untuk manfaat rohani kita.

Sta Thérèse dari Lisieux pernah menulis tentang gangguan semasa berdoa.

Katanya, “Saya mempunyai banyak [gangguan] tetapi sebaik sahaja saya menyedarinya, saya beralih untuk berdoa bagi orang-orang yang memerlukan perhatian saya.”

Kadang-kadang Tuhan ingin mengalihkan perhatian kita, mendorong kita untuk mengingat rakan atau ahli keluarga yang sedang dalam kesukaran.

Mereka mungkin memerlukan doa atau sedekah kita. Dengan cara ini, gangguan itu diubah ke arah yang betul dan bukannya menjauhkan kita daripada Tuhan, ia membawa kita lebih dekat kepada-Nya dan rancangan ilahi-Nya.

Kuncinya ialah untuk memberi perhatian apabila itu berlaku dan perhatikan apabila anda mula memikirkan seseorang

Gangguan semasa berdoa

dalam hidup anda, atau bahkan sesuatu yang anda lihat di Facebook. Dalam setengah kes, Tuhan mungkin mahu anda berdoa untuk individu itu atau menghulurkan bantuan kepada mereka.

Bagi anda yang selalu berasa tidak dapat menumpukan perhatian semasa Misa Kudus, berikut merupakan doa gubahan Sto Thomas Aquinas untuk didoakan sebelum Misa Kudus.

Doa sebelum Misa Kudus oleh Sto Thomas Aquinas

*Tuhan yang mahakuasa dan kekal,
Aku datang kepada Sakramen Putra Tunggal-Mu,
Tuhan kami Yesus Kristus.
Aku datang,
sebagai seorang pesakit kepada doktor kehidupan,
sebagai seorang yang hina kepada sumber belas kasihan,
sebagai seorang yang buta kepada cahaya terang abadi,
sebagai seorang yang miskin dan memerlukan kepada Tuhan pencipta langit dan bumi.
Tuhan, dalam kemurahan hati-Mu yang besar,
sudilah kiranya menyembuhkan penyakitku,
menguduskan kehinaanku,
mencelikkan kebutaanku,
memperkayakan aku dari kemiskinan dan menyelubungi aku dari ketelanjangan.*

*Agar aku layak menerima Roti para Malaikat, Raja dari segala raja,
Tuhan dari segala tuan,
dengan hormat dan kerendahan hati,
dengan kemurnian hati dan iman,
dengan pertobatan dan cinta kasih,
dan dengan tujuan demi membawaku kepada keselamatan.*

*Semoga aku layak menerima Sakramen Tubuh dan Darah Tuhan,
dan juga realiti dan daya kuasanya.
Tuhan yang Maharahim,
Semoga aku layak menerima Tubuh Putera Tunggal-Mu,
Tuhan kami Yesus Kristus, yang lahir dari rahim Santa Perawan Maria;
sehingga aku layak dimasukkan dalam Tubuh mistik-Nya,
dan terhitung di antara orang-orang kepunyaan-Nya. Amin.*

Aleteia



PENULIS BERKICAU

Penziarah harapan pada tahun 2026

Tahun Jubli 2025 yang mengangkat tema “Penziarah Harapan”, telah memberi laluan kepada bab baharu dalam kehidupan Gereja. Pintu Suci telah ditutup, perayaan utama telah selesai, dan pencapaian simbolik telah dicapai.

Namun Gereja tidak melangkah ke tahun 2026 dengan rasa kehilangan atau kekosongan rohani. Apa yang kekal bukanlah kesunyian, sebaliknya panggilan yang lebih tenang dan mendalam untuk menghidupkan apa yang telah diraikan.

Sepanjang Tahun Jubli, Gereja Asia telah menempuh rahmat di tengah-tengah ketidakpastian, iman di tengah-tengah kerapuhan. Harapan bukan sekadar diucapkan dari mimbar atau tertulis pada sependuk; ia diuji, diperhalusi, dan, di kebanyakan tempat, iman dipraktikkan, diperolehi dengan susah payah.

Tahun Jubli, tidak berakhir di ambang basilika. Dari segi teologi dan pastoral, ia menghantar orang percaya kembali ke dunia, diamanahkan dengan apa yang telah mereka terima.

Penutupan Pintu Suci mengingatkan umat beriman bahawa Gereja itu sendiri kini mesti menjadi pintu terbuka, di mana belas kasihan diamanahkan, bukan hanya diisytiharkan.

Di seluruh Asia, Jubli berlangsung di tengah-tengah realiti yang suram. Di Myanmar, keganasan yang berterusan dan ketidakstabilan politik terus memindahkan ribuan orang, memaksa keluarga, termasuk wanita, kanak-kanak, dan warga emas, untuk hidup dalam ketidakpastian dan kerugian.

Laporan-laporan dari agensi berita berulang kali melaporkan tentang ketabahan senyap komuniti di sana, di mana pemimpin agama dan Gereja tempatan kekal rapat dengan mereka yang menderita, menawarkan kehadiran, doa dan sokongan kemanusiaan di tengah-tengah ketakutan dan keletihan.

Di tempat lain, semangat Jubli menemui ekspresi dalam cara yang berbeza tetapi sama bermakna.

Di Filipina, golongan muda tampil ke hadapan dengan kreativiti dan keyakinan. Melalui inisiatif seperti *Hackathon: Mission Possible*, belia memamerkan idea inovatif yang bertujuan untuk menangani cabaran sosial, daripada kemiskinan dan kemerosotan alam sekitar kepada pendidikan dan celik digital.

Penglibatan mereka mencerminkan Gereja yang mempercayai golongan mudanya bukan sahaja untuk mewarisi masa depan, tetapi juga untuk membantu membentuknya dengan hati nurani dan belas kasihan.

Di Malaysia, sembilan bulan lagi, sembilan keuskupan/agung akan berhimpun buat pertama kalinya. Ia merupakan perhimpunan peringkat nasional bagi membincangkan empat bidang utama: Gereja, Masyarakat, Ekologi dan Sosial.

Semoga pengalaman kita pada Tahun Jubli Harapan, menjadikan kita pembawa harapan pada masa-masa ‘gelap’, lebih prihatin kepada golongan miskin, yang lemah dan menjaga bumi, rumah kita bersama.

MARI dan jadilah komuniti pemberita HERALD.
Kami amat mengalu-alukan sumbangan artikel, pendapat dan perkongsian kita.

Kami mengalu-alukan artikel dalam 400-500 patah perkataan, gambar high-resolution (300 DPI) dalam format JPG atau PNG serta berkapsyen.

Kita boleh menghantar artikel kepada liza@herald.com.my atau

WhatsApp: 011-26391498



● sambungan dari BM 3

Harapan dalam Kristus tidak akan pernah berakhir



Keuskupan Sandakan: Kekuatan dalam menghadapi "saat-saat Herodes"

SANDAKAN: Setelah setahun penuh rahmat Tahun Jubli Harapan, maka berakhirlah Tahun Suci yang melihat ramai penziarah melakukan ziarah di pusat-pusat ziarah terpilih.

Di Keuskupan Sandakan, Tahun Jubli Harapan diakhiri dengan Misa Kudus yang dipimpin oleh Uskup Julius Dusingit pada Disember 28, 2025 di Katedral St Mary.

Gereja Katolik sejagat turut merayakan Pesta Keluarga Kudus pada hari tersebut.

Dalam khutbahnya, Uskup Julius merenungkan Keluarga Kudus sebagai model kehidupan Kristian. Yesus, Maria, dan Yosef sebuah keluarga yang sederhana namun suci, hidup

dalam ketaatan sepenuhnya kepada kehendak Tuhan.

Terpaksa melarikan diri ke Mesir, mereka mengalami perpindahan di tanah asing, dengan teguh mempercayai perlindungan Tuhan. Iman Maria mengatasi ketidakpastian, manakala Yosef bergantung pada bimbingan Tuhan untuk membawa keluarganya ke tempat yang selamat.

Apa yang benar-benar luar biasa ialah Tuhan memilih keluarga biasa sebagai alat penyelamatan.

Uskup Julius mengingatkan umat beriman bahawa setiap daripada kita mungkin menghadapi "saat-saat Herodes" namun iman memanggil kita



untuk mempercayai ketentuan dan bimbingan Tuhan.

Prelatus itu menggesa keluarga untuk menerima ketidaksempurnaan mereka, menekankan kepentingan doa dalam keluarga, menyatakan bahawa apabila keluarga berdoa bersama, mereka mewujudkan sesuatu yang berkuasa, sesuatu yang dunia tidak dapat berikan atau jelaskan.

Beliau seterusnya menggalakkan umat beriman untuk tidak hanya melihat ke dalam, tetapi juga memberi perhatian kepada mereka di sekeliling mereka, terutamanya golongan miskin, pendatang, gelandangan, dan yang kesepian. Meskipun Tahun Jubli Harapan berakhir, buah-buahnya terus berbuah dalam hati umat yang setia.

Dengan mencontohi Keluarga Kudus, kita dipanggil untuk menjadi pembawa harapan melalui belas kasihan, iman, dan pelayanan.

Tema Jubli, "Harapan tidak mengecewakan" (Roma 5:5), berfungsi sebagai cahaya panduan sepanjang tahun, menggesa umat beriman untuk mengembara menuju Yesus, sumber keselamatan.

Keuskupan Miri: Kristus sauh harapan kita

MIRI: Berakhirnya Tahun Jubli Harapan tidak menandakan berakhirnya harapan, kerana harapan umat Kristian berakar umbi dalam Kristus, yang tidak pernah mengecewakan. Demikian kata Uskup Richard Ng ketika memimpin Misa Kudus penutup Tahun Jubli Harapan pada Disember 28, 2025 di Katedral St Joseph.

"Kristus," katanya, "ialah sauh iman kita, asas kita, dan talian hayat kita."

"Apa sahaja cabaran yang kita hadapi dalam hidup, kita dipanggil untuk terus hidup dalam harapan," kata Uskup Richard.

Prelatus itu menambah, "Hati Tuhan sentiasa terbuka, dan tidak kira apa jua keadaan yang kita hadapi, kita sentiasa boleh kembali kepada-Nya, kerana sentiasa ada tempat di hati Tuhan untuk orang berdosa."

Sempena Pesta Keluarga Kudus, Uskup Richard mengingatkan umat beriman bahawa Krismas adalah lebih daripada sekadar perayaan atau tradisi.

"Kalahir Kristus," katanya, "adalah panggilan untuk transformasi hati dan kehidupan."

Prelatus itu menekankan bahawa Yesus datang bukan sahaja untuk membawa penyelesaian, tetapi untuk menawarkan kedamaian yang berakar umbi dalam iman, kepercayaan,

dan ketaatan kepada Tuhan.

Tegasnya, kedamaian Kristian yang sejati tidak bergantung pada kekayaan, kejayaan, atau ketiadaan masalah, tetapi pada hidup dalam hubungan yang betul dengan Tuhan dan sesama.

Uskup Richard menggesa umat beriman untuk meneliti kehidupan mereka berulang kali dan bertanya kepada diri sendiri sama ada mereka hidup dengan kerendahan hati, mengampuni, berbelas kasihan lebih-lebih lagi dalam keluarga dan komuniti mereka.



Keuskupan Sibu lancar Tahun Keuskupan Manusia dan Perkahwinan Suci



SIBU: Uskup Joseph Hii menutup Tahun Jubli 2025 di Gereja St Teresa, Sungai Merah pada Januari 1, 2026.

Perayaan Ekaristi ini bertepatan dengan Misa Tahun Baharu, Hari Raya Maria, Bonda Tuhan, sekaligus Pelancaran Tahun Keuskupan Manusia dan Perkahwinan Suci.

Dalam khutbahnya, Uskup Hii menggalakkan semua orang untuk meneruskan ziarah mereka setiap hari, mengingatkan mereka bahawa kehidupan mereka di bumi adalah perjalanan menuju tanah air kita yang sebenar.

Uskup Hii juga menggesa umat beriman untuk hidup sebagai penziarah yang membawa cahaya Kristus kepada orang yang kita temui, membolehkan kehidupan seharian kita menjadi saksi hidup iman, harapan dan kasih.

Selepas Misa, kad doa untuk Tahun Keuskupan Manusia dan Perkahwinan Suci, bertajuk "Kesatuan dalam Penciptaan Tuhan," diedarkan kepada wakil dari pelbagai paroki Keuskupan Sibu, melambungkan komitmen bersama untuk menghayati fokus pastoral ini sepanjang tahun.

Keuskupan Keningau: Paroki St Peter bakal jadi pusat ziarah sejarah Msgr August Wachter

KUALA PENYU: Sempena penutupan Tahun Jubli Harapan peringkat Keuskupan Keningau, Uskup Cornelius Piong mencadangkan paroki St Peter Bundu, agar diisytiharkan sebagai tempat ziarah bersejarah bagi mengenang paderi, misionari dan prefek apostolik pertama di Borneo Utara iaitu Msgr August Wachter.

Jasa Msgr August Wachter dalam perkembangan agama Katolik, amat besar di Sabah. Selain mempertobatkan ramai rakyat Borneo, mendirikan sekolah, mision, beliau juga telah menubuhkan kongregasi religius wanita pertama Sabah iaitu kongregasi *The Franciscan Sisters of the Immaculate Conception* (FSIC).

Misa Kudus penutupan Tahun Jubli Harapan dimulakan dengan ziarah peribadi di Taman Ziarah Harapan, kemudian dengan memegang lilin, para penziarah berarak masuk ke Gereja St Peter untuk merayakan Misa Kudus penutup dan Pesta Keluarga Kudus.

Paderi paroki St Peter, Fr Roney Mailap, dalam ucapan mengatakan salah satu cabaran menjadi pusat ziarah di Keuskupan Ken-

ingau ialah kedudukan geografinya selain cabaran budaya dan masyarakatnya. Ini adalah kerana Keuskupan Keningau terbahagi kepada dua bahagian iaitu bahagian pendalaman atas dan pendalaman bawah.

Terdapat tiga jalan perhubungan yang boleh dilalui namun ada cabarannya yang tersendiri. Beliau megimbas kembali sewaktu mengetuai paroki St Peter untuk berziarah ke bahagian pendalaman atas, mereka menghadapi cabaran dan masalah sehingga lewat tiba ke destinasi.

Namun bagi Fr Roney, ia adalah pengalaman ziarah yang mendewasakan dan pengalaman ziarah itulah yang mematangkannya sebagai paderi dan mengajarnya agar selalu berserah serta percaya kepada Tuhan.

Sepanjang Tahun Jubli 2025, Keuskupan Keningau telah menetapkan tujuh pusat ziarah.

Dalam ucapannya, Uskup Cornelius menggesa umat agar meneruskan ziarah ke pusat-pusat ziarah tersebut kerana "perjalanan ziarah kita tetap berterusan selama kita hidup di bumi ini!"

